

# Ilinniarnertuunngorniarfinni ilinniarnermut ileqqorissaarnermullu malittarisassat pillugit Namminersorlutik Oqartussat nalunaarutaat

Ilinniarnertuunngorniarneq pillugu Inatsisartut inatsisaanni nr. 13, 22. november 2011-meersumi § 55, imm. 3 naapertorlugu aalajangersarneqarpoq:

## *Siunertarisaq, atuutilersitsineq tamanullu saqqummiussineq*

**§ 1.** Ilinniarnertuunngorniarfinni ataasiakkaani ilinniarnermut ileqqorissaarnermullu malittarisassat ilinniarnertuunngorniarfimmi ilinniarnernup siunertarisaq qulakkiissavaat aammalu ilinniartunut, ilassutaasumik ilinniartitsissutinilu ataasiakkaani pikkorissartut kiisalu ilinniarfimmi sulisunut pitsaasumik avatangiiseqarnissaannut tapeeqataassallutik.

**§ 2.** Ilinniartut siunnersuisoqatigiivisa aammalu ilinniartitsisut siunnersuisoqatigiivisa tusarniareernerisigut ilinniarnermut ileqqorissaarnermullu malittarisassanik ilinniarfimmi ilinniartunut atuuttunik rektori aalajangersaassaaq.

*Imm. 2.* Malittarisassat imarissavaat ilinniarnertuunngorniarfiup torersaarnermut ataatsimooqatigiinnermullu malittarisassai, ilinniartut atuartitsinermit suleqataalluarlutik peqataanissaminnut pisussaaffeqarnerat aammalu ilinniartunut ilinniarfiup ilinniarnermut ileqqorissaarnermullu malittarisassaanik malinninngitsunut rektorip qanoq iliuuseqarsinnaaneraniq nassuiaat.

*Imm. 3.* Aammattaaq ilinniartut sumiginnaasut ilinniarfimmit qanoq pineqartarnersut pillugu malittarisassani nassuiaatigineqassaaq.

**§ 3.** Ilinniarfiup ilinniarnermut ileqqorissaarnermullu malittarisassai ilinniartunit pissarsiarineqarsinnaassapput aammalu ilinniarfiup nittartagaani allassimassallutik. Ilinniarnermut ileqqorissaarnermullu malittarisassat pillugit ilinniarfiup ilinniartut ilisimatissavai aammalu malittarisassat malinneqanngippata tamanna qanoq kinguneqarsinnaanersoq pillugu ilisimatissallugit.

*Imm. 2.* Ilinniarfiup ilinniarnermut ileqqorissaarnermullu malittarisassai rektorip Naalakkersuisunut ilisimatitsissutitut nassiutissavai.

## *Atuartitsinermit nalinginnaasumik torersuunissaq atuartitsinerimulluapeqataalluarnissaq*

**§ 4.** Ilinniartuup ilinniarnermut ileqqorissaarnermullu malittarisassaanik malinninnissaminut ilinniartut pisussaataitaapput.

*Imm. 2.* Atuartitsinermi peqataannginnerit tamarmik peqataannginnermut peqqutaasoq apeqqutaatinnagu peqataannginnertut nalunaarsorneqassapput

**§ 5.** Ilinniartut atuartitsinermi pinngitsooratiq peqataasussaaneranni makku atuupput:

- 1) Atuartitsinermi ilinniartuup najuunnissamik piumasaqaataaffiusumi peqataaneq.
- 2) Allaffissornermi periutsit atuartitsinermi suleqataalluarluni peqataanerup nalunaarsorneqartarneranut ilinniartuup atugaanik pinngitsoorani atuinnissaq ilinniartunillu attaveqarnissaq.
- 3) Pitsaassutsikkut annertussutsikkullu piumasaqaatinik aalajangersarneqartunik malinnilluni allattariarsornikkut naammassiniagassanik piffissaq eqqorlugu tunniussisarnissaq.
- 4) Piffissani aalajangersimasuni misilitsinnerni, ukiumoortumik misilitsinnerni assigisaannilu peqataaneq.
- 5) Ilinniarnermi takusassarsiornerit, paasisassarsiorluni angalanerit il.il. peqataasut nerisaqarnerinnarmut akileeqataaffigisaat, annerpaamillu ullut-unnuallu aallartittut tamaasa 50 kr.-mik akeqartinneqartut.
- 6) Atuartitsinermi allami, tassunga ilanngullugu namminersortumik suliaqarnermi ungasianillu atuartitsinermi atuartitsinerup ilarisaatut pilersaarusiorneqartumi peqataaneq.
- 7) Iliuseqarnissamik pilersaarummik § 11 naapertorlugu suliarineqartumik malinninnissamut pisussaaffeqarneq.

**§ 6.** Ilinniartuq najuuttoq innarluuteqarnini allatulluunniit piginnaanikinnini pissutigalugu ilinniartitsissummi ataatsimi arlalinniluunniit suleqataalluarluni peqataasinnaanngitsaq qinnuiginninnermigut rektorip aalajangersimasumik naliliinera malillugu atuartitsinerup ilaani peqataanngissinnaavoq. Peqataannginnissamik qinnuiginninnermut uppersaatsissatut nakorsamit uppersaammik tunniusseqqullugu rektorip ilinniartuq qinnuigissinnaavaa. Aamma tamanna atuuppoq ilinniartunut allanik peqquteqarlutik ilinniartitsissummi ataatsimi arlalinniluunniit atuartitsinermi suleqataalluarlutik peqataasinnaanngitsunut kiisalu ilinniartunut timersornermik atuartitsissummi peqataannginnissamik qinnuiginnittunut.

*Imm. 2.* Ilinniartuup ilinniarnermut ileqqorissaarnermullu malittarisassani nalunaarneqassaaq ilinniartuq qanoq ilinikkut nakorsamit uppersaammik piumasaqarfigineqassanersoq. Nakorsamit uppersaammut aningaasartut ilinniartuup akilerneqassaaq.

**§ 7.** Ilinniartut ataasiakkaat atuartitsinermi peqataanerisa, tassunga ilanngullugu allattariarsorluni naammassiniagassanik tunniussisarnerisa nalunaarsorneqartarnissaat rektorimit qulakkeerneqassaaq.

*Imm. 2.* Ilinniartut ataasiakkaat ilinniartuup ilinniarnermut ileqqorissaarnermullu malittarisassani malittarisassat aalajangersarneqartut malillugit atuartitsinermi namminneq peqataanermik nalunaarsorneqarneranut nakkutilliinissamut oqaaseqaateqarnissamullu periarfissaqartinneqassapput. Nalunaarsuineq ukiumut ilinniartuup ataatsimut atuuttassaaq, taamaattoorli tak. imm. 3.

*Imm. 3.* Pisussaaffinnik annertuumik immikkut sumiginnaasoqartillugu nalunaarsuineq rektorip naliliineratigut ukioq ilinniartuup ataaseq sinnerlugu sivitsorneqarsinnaavoq.

*Imm. 4.* Takkutinngitsoortarneq, tassunga ilanngullugu allattariarsorluni naammassiniagassanik tunniussinngitsoortarneq killilersimaarniarlugu ilinniartuup sumiginnaaneri sapinngisamik siusissukkat qisuariarfigineqartarnissaat rektorimit qulakkeerneqassaaq.

**§ 8.** Ilinniarfiup ilinniarnermut ileqqorissaarnermullu malittarisassaanik annikinnerusumik unioqqutitsisoqarnerani ilinniartuq perorsaanikkut rektorimit avoqqaarneqarsinnaavoq. Perorsaanikkut avoqqaarineq iliuuserisassanut ilaanngilaq, takuuk § 9.

*Iliuuserisassat iliuuseqarnissamullu pilersaarutit*

**§ 9.** Ilinniartumut ilinniarfiup ilinniarnermut ileqqorissaarnissamullu malittarisassaanik malinninngitsumut perorsaanikkut avoqqaarineq ilinniarfiup rektorianit naammanngitsutut isigineqarpat iliuuserisassat makku atorineqarsinnaapput:

- 1) Mianersoqqusummik tunisineq
- 2) Aaqqissuussani ingerlataniluunniit aalajangersimasuni peqataaqqusinnginneq.
- 3) Ukiup ilinniarfusup ingerlanerani piffissani sivikinnerusuni atuartitsinnermi peqataanngikkallartitsineq.
- 4) Ilinniartitsissutini ataasiakkaani tamaniluunniit ukiumi ilinniarfusumi pineqartumi klassimi killiffimmi misilitsinnermik naggaserneqarsinnaasuni misilitsinnissamut innersuussineq.
- 5) Ilinniartitsissummi ataatsimi arlalinniluunniit ukiumi ilinniarfusumi pineqartumi misilitsinnermik naggaserneqartussani misilitsinnissamut innersuunneqarsinnaatitaanermik annaasaqarneq. Ilinniartuq pineqartuq misilitsinnermi ataatsimi arlalinniluunniit peqataagaluarluni klassimi killiffiup tullianut ingerlaqqinnissaa ilinniarfiup rektorianit aalajangerneqarpat ilinniartitsissummi ilinniartitsissutiniluunniit pineqartuni ukiumi tulliuttumi misilitsittoqassaaq.
- 6) Nammineerluni ilinniartussatut innersuussineq.
- 7) Ilinniarnermut anisitaaneq (ilinniarunnaarsitaaneq).

*Imm. 2.* Imm. 1, nr. 4-7 naapertorlugit aalajangiinnerit misilitsinnerit ingerlanneqarnissaannut ukiumoortumik pilersaarutip tamanut saqqummiunneqarnissaani kingusinnerpaamik qaammat ataaseq sioqqullugu aalajangerneqartassapput. Imm. 1, nr. 4 naapertorlugu aalajangiinnerni ukiumoortumik inaarutaasumik karakteriliisoqassanngilaq aammalu ilinniartitsissummi pineqartumi ukiumoortumik karakteriliissutaareersut atorunnaassapput.

*Imm. 3.* Iliuuserisaq aallartinneqarneq naammaginnartuullunilu ilinniarfiup ilinniarnermut ileqqorissaarnermullu malittarisassaanik unioqqutitsinnermut sanilliullugu naleqquttuussaaq.

**§ 10.** § 9, imm. 1, nr. 2-7 malillugit iliuuserisassat aatsaat aallartinneqarsinnaapput rektorip aalajangersimasumik naliliineratigut aammalu allakkatigut siumoortumik mianersoqqusummik tunniussisoqareernerata kingornagut, taamaattorli takuuk immikkoortoq 3.

*Imm. 2.* Allakkatigut mianersoqqussut ilinniartumut tunniunneqassaaq aammalu ilinniartuq angajoqqaatut oqartussaaffigineqarpat angajoqqaatut oqartussaasumut allakkatut tammatsaaliukkatut nassiunneqarluni. Mianersoqqussut ukiup ilinniarfusup nutaap aallartinnerani atorunnaassaaq, ukiuni ilinniarfusumi nutaami ilinniartup ukiup ilinniarfusup siuliani mianersoqquneqaatigisaminik pissusilersornini ingerlatiinnarpagu atuutiinnassalluni.

*Imm. 3.* Pisuni immikkut ilungersunaatilinni, tassunga ilanngullugu pigisanik inunnilluunniit annertuumik innarliiniarneq unitsinniarlugu pinaveersaartinniarluguluunniit imaluunniit iliuutsinik uteqqiinneri allakkatigut ilimasaareqqaarnani iliuuserisassat aallartinneqarsinnaapput.

**§ 11.** Ilinniarteq § 9 malillugu iliuuseqarfigineqarpat iliuuseqarnissamut pilersaarummik suliarinnittoqarnissaanik ilinniarteq piumasaqarsinnaavoq, tassuunakkut ilinniarteq pissusilersornermi iliuuseqarnermik kinguneqaataasup allanngortinnissaanut ilitsersorneqarlunilu tapersersorneqassalluni. Ilinniarfik ilinniarteq, angajoqqaatut oqartussaaffigineqarpat taassuma angajoqqaatut oqartussaasui suleqatigalugit iliuuseqarnissamut pilersaarusiussaaq.

*Ilinniartitsissutini ataasiakkaani pikkorissartut il.il.*

**§ 12.** Nalunaarut pikkorissartunut ilinniartitsissutini ataasiakkaani ilinniartinneqartunut assinganik atuutissaaq, ilinniartitsissutinili ataasiakkaanut pissutsinik immikkut ittunik tunngavilersorneqartunut atuutissanani.

**§ 13.** Nalunaarut ilinniarnertuunngorniarmimmi ilassutitut pikkorissarnerni pikkorissartunut assinganik atuutissaaq, pikkorissartunut taakkununga pissutsinut immikkut atugassaritinneqartunut atuutissanani.

*Illuatungerisanut tusarniaaneq naammagittaalliornerlu*

**§ 14.** Nalunaarut manna naapertorlugu rektorip aalajangigai pisortat ingerlatsineranni inatsisit malillugit aalangiinerupput.

*Imm. 2.* § 9, imm. 1 naapertorlugu iliuuseqarnissamik aatsaat aalangiisoqarsinnaavoq ilinniarteq ilinniartorlu angajoqqaatut oqartussaaffigineqarpat taassuma angajoqqaatut oqartussaasui piffissaqartitsilluarluni tusarniaaffigineqarsimappata. Tusarniaanerp tiguisussamut nalunaarutigineqarneranit tusarniaanermut akissuteqarnissamut piffissarititaq ullunit marlunnit sivikinnerussanngilaq, taamaattoorli tak. § 10, imm. 3.

**§ 15.** Nalunaarut manna malillugu rektorip aalajangigai ilinniartumit imaluunniit ilinniarteq angajoqqaatut oqartussaaffigineqarpat taassuma angajoqqaatut oqartussaasuinit nalunaarutip nalunaarutigineqarneranit sapaatip akunneri marluk qaangiutsinnagit ilinniartitaanermut Naalakkersuisoqarfimmut naammagittaalliuutigineqarsinnaapput.

*Imm. 2.* Naammagittaalliuut allaganngorlugu ilinniarfimmimmi rektorimut tunniunneqassaaq, rektorip suliami nammineq oqaaseqaatini ilanngullugit naammagittaalliuut ilinniartitaanermut Naalakkersuisoqarfimmut ingerlateqqissallugu. Suliap ingerlateqqinneqannginnerani rektorip naammagittaalliuuteqartoq sapaatip akunnerata ataatsip ingerlanerani oqaaseqaammut oqaaseqaateqarnissamut periarfississavaa. Naammagittaalliuuteqartup oqaaseqaatigisinnaasai Naalakkersuisoqarfimmut ilanngullugit nassiunneqassapput.

*Imm. 3.* Ilinniarfimmimmi rektori pisunilu immikkut ittuni Naalakkersuisoqarfik tamanna pillugu aalangiitinnagit § 9, imm. 1 naapertorlugu iliuuserisassanngortinneqartut pillugit naammagittaalliuutit atuukkunnaarallartinneqarsinnaanngillat.

*Atuutilerfissaaq ikaarsaariarnermilu aalajangersakkat*

**§ 16.** Nalunaarut ulloq 1. august 2012 atuutilerpoq.

*Imm. 2.* Ilinniarnermut ileqqorissaarnermullu malittarisassat piffissami nalunaarutip atuutilernerani ilinniartinnit ataasiakkaani atuutsinneqartut atuutiinnassapput nalunaarut manna tunngavigalugu ilinniarnermut ileqqorissaarnermullu malittarisassanit nutaanit taarserneqarnissamik tungaanut.

*Imm. 3.* Ilinniarnermut ileqqorissaarnermullu maleruqaqqusani atuuttunik nutarterineq kiisalu § 2, imm. 1 aamma § 3, imm. 1-2 naapertorlugit tusarniaaneq tamanullu saqqummiussineq ullup nalunaarutip matuma atuutilerfiata kingorna kingusinnerpaamik qaammatit marluk kingorna ingerlanneqassapput.

*Kalaallit Nunaanni Namminersorlutik Oqartussaq, ulloq 23. juli 2012*

Palle Christiansen

/

Mikael Kristensen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut